

## Ukorontiyawa

<sup>1</sup> Meng Bulus, uyiculun Kristi Yisa nso unan kadura bara uyinnu Kutelle, a Sostanisu gwana bit, <sup>2</sup> udu kiti na nan tortu Kutelle na idi in Korintus, alenge na Kristi Yisa nati nani iso lan, iwa yiwa nani iso anit alau, vat nan na lenge na idin yicu lissan Cikilari bite Yisa Kristi in ko kame kiti, Cikilari mine nini unbit. <sup>3</sup> Na ubolu me nin lissosin lisheu unuzu kitiin Kutelle ucif bit a Cikilari Yisa Kristi. <sup>4</sup> Ndin godu Kutelle ning ko kome kubi bara anughe, nan nyan bolu Kutelle na Kristi Yisa nani minu. <sup>5</sup> Ana tti minu anan se nan nya ko lome libau, nan nya nliru nin yiru vat. <sup>6</sup> Ana ti minu ita imon nacara, nafo na ubellee nimon liburu libo litin Kristi, na nuzu kanang nan nya mine. <sup>7</sup> Bara nani na idiira ufillu nruhuba, naffo na ina yita nin tok ncaa nnuzu kanang in Cikilari bite Yisa Kristi. <sup>8</sup> Ame ni minu akara tutung udi duri imaline, bara inan so sa alapi lirin Cikilari bite Yisa Kristi. <sup>9</sup> Kutelle di nin yinnu, ame ulenge na ana yicila minu nan nya lissosin ligo nin saunne, Yisa Kristi Cikilari bite. <sup>10</sup> Nene ndi munu kucukusu, nuana nilime nan nishono, nan nya lissan Cikilari bite Yisa Kristi, na vat mine na yinin, na i wa se uwucu nati nati nan nya mine ba. Ndi kucukusu imunu ati umalizinu kugir kun lo ligowe nin kibinai kirum a udalili urim. <sup>11</sup> Nani anan gan kuluwi na da tyi vet natuf nbeleng nworu uwutuzunu din piun nan nya mine. <sup>12</sup> Nene uliru niighe ule: Ko

gha mine din su, “Mengg un Bulus ari,” “Meng un Apolos” “Meng un Kefas,” sa, “Mengg un Kristi.” <sup>13</sup> Kriste nkoso kidowa? iwa kotun Bulus ku kuca bara anughe? Iwa shintin munu nmyen nan nya lissan Bulussa? <sup>14</sup> Ndi nin liburi libo kiti Kutelle na nna shintin umon mine nmyen ba, se kiribun nin Gayus. <sup>15</sup> Una so nani bara na umong mine man woru miyari na shintin ghe nmyen nan nya lissa ning ba. <sup>16</sup> Ina kuru nshintino anan gan Istifanus ku. Nbanda nani, nan yiru sa nnakuru nshintu among tutung ba. <sup>17</sup> Bara ana Kristi na tuyi nshitu anitari nmyen ba nani nsu uwazi nliru ntucuari na nin nagbulan njinjin nnit ba, bara kuca nkootunu in Kristi wa so imon ihe. <sup>18</sup> Bara kadura kuca nkotunuee tilalanghari kiti na lenge na i din nan nya nkul. Nani kitii na lenge na Kutelle din kacisso mine, likara Kutelle ari. <sup>19</sup> Bara ina nyertin, “Meng ma malu kiti nin dadiu na yinjini” mma canu uyinnu na nan yiru. <sup>20</sup> Unit ujinjinghe din weri? Unan ni nyerte din we? Unan piziru in yinnu nko kuje din we? Na Kutelle na kpilya njinjin in yeh misoo tilalang ba? <sup>21</sup> Bara na uyih vat nin jinjing nnin na una yinnin Kutelle ba, una poah Kutelle liburi nan nya tilalan nbellu nliru Kutelle kiti na lenge na iyinna. <sup>22</sup> A Yahudawa wa piziru imon al'ajibi a Hilinawa pizira njinjing. <sup>23</sup> Nani arik din uwazi nkotunu in Kristi, litala ntizuru na Yahudawa a tilalang kiti na Hilinawa. <sup>24</sup> Kiti na lenge na Kutelle na yicila, a Yahudawa nin na Hilinawa, ti din su uwazi in Kristi nafo Likara nin kujinjin Kutelle. <sup>25</sup> Bara tilalang Kutelle katin likara njinjing nanit, a usali likara Kutelle

katina akara nanit. <sup>26</sup> Yenen imusun in yicilue na Kutelle na yicila munu mun, nuana nilime nin nishono. Na gbardan mine wa di jinjing ba nan nya yenjun nanit. Na gbardang mine wadi nin gongong mbun nanit ba. <sup>27</sup> Nani Kutelle wa fere imon ilalang in yih ani unit ujinjing ncin. Kutelle waa fere imon nsali nakara in yih ani imon nakara in yih ncin mun. <sup>28</sup> Kutelle wa fere imon igugur na ina filing in yih umunu imon ile na tiyira inin nafo imon ile na arik in yira imon icinari. <sup>29</sup> Ana su nani bara ummong wa se imon for figiri mbun me. <sup>30</sup> Bara imon ile na Kutelle na su, nene i di nan nyan Kristi Yisa, Ulenge na ana so nari njinjing kiti Kutelle katwa kacine bite, nlau bite nin utucu bite. <sup>31</sup> Nafo, na i nyerte nabelin, "Na ulenge na ana fo figiri na a fo nan nyan Cikilari."

## 2

<sup>1</sup> Meng wang, nuanna nilime nan nishon kubi na nwa dak kitimine, na nwa dak nin umon inyiru un litining isa njinjing ninghari ba nwa su munu uliru nimon Kutelle ilenge na i nyeshin ba. <sup>2</sup> Nna yyiru na kibinai ning na mma yinnu imonmong kube na nwa di nan nya mine ba, se dei Yisa Kristi cas, na amere i na kotum kuca. <sup>3</sup> Tutung nwa di nanghinu nan nya lidarni, nin fiu a nan nya nkitizu. <sup>4</sup> Uliru nighe nin wazi nighe na nwa su nin nagbulang nrissu kujinjing ba, nani nin dursuzu nimon in yenju nin Ruhu a likara, <sup>5</sup> bara uyinnu sa nyenu fe wa so nan nya kujinjin nanit, nani nsn nys likrsr Kutelle. <sup>6</sup> Nene asa ti lira nin kujinjin nan nya na wasara,

na njinjing nle uyeh ba, sa njinjing nago nko kuje ba, alenge na kubi mine din katuzu. <sup>7</sup> Nan nya nani ti di bellu njinjing Kutelle nan nya kidegen linyeshin njinjing mo na mi wa nyeshin uworsu, mongo na Kutelle wa da ceo uworsu ana kuji bite nsa da ba bar ngongong bite. <sup>8</sup> Na umong nago nko kuje yiru ninn mo njinjing ghe ba, bara andi ina yinin minin nkoni kube, na i wana kotun Cikilarii ugongong ba. <sup>9</sup> Nafo na ina nyertin, “Imon ilenge na iyizi nsa yene ba, na kutuf nsa lanza ba, na nkan kibinai nsa kipiliza ba, imon ilenge na Kutelle na ke bara alenge na idi nin su me.” <sup>10</sup> Ilenge imonere Kutelle na puun nari inin nan nyan Ruhu, bara Uruhu din piziru imon vat, umunu imon iconcom Kutelle wang. <sup>11</sup> Ghari yiru ukpilizu kibinai nmong se dei uruhun nlenge na adi nan nya me? Nanere wang, na umon yiru imon iconcom Kutelle ba se dei Uruhu Kutelle. <sup>12</sup> Nani na arike na seru Uruhu in yih ba, fina na seru Uruhu ule na una nuzu kiti Kutelle, arike nan se ti yinno imon ile na ina ni nari unuzu kiti Kutelle sheu. <sup>13</sup> Ti din su uliru kitene nimon nin nagbbwang alenge na njinjing nnit wasa a dursuzu nari. Uruhue din kpilizu agbulang nruhu nin jinjing nruhu. <sup>14</sup> Na unan salin nruhu wasa a sere imon ile na idi Nruhu Kutelle ba, bara ileli imone nlalanghari kitime. Na awa sa a yinno inin ba bara ina dumun inin nin Ruhu. <sup>15</sup> Ulenge na adi nin ruhu wasa a wuco imon vat, ana imong wasa a wuco imon me ba. <sup>16</sup> “Nani ghari wasa ayinno kibinai nCikilare, na ama dursuzu ghe?” Vat nani ti din kibinai nKristi.

### 3

<sup>1</sup> Meng wang linuana, na nna yinin nsu minu uliru nafo anan ruhu ba, nan nya nani nafo anit na nidowo, nafo nono nibebene nan nyan Kristi. <sup>2</sup> Ina niza minu mmadrari na inawa ba, bara na iwa di isa duru uli ni nawa ba. Nene wang na isa duru ule ba. <sup>3</sup> Nene idu nan nya nidowo. Bara kikanga na liyarin nin fyeu nayi diku nan nya mine, na i sosin nan nya nidowo ba, tutung na idin cine nafo usu na nit ba? <sup>4</sup> Bara asa umong nworu, “Ndin dortu Bulus ku,” umon tutung woro, “Meng din dortu Apolos ku,” na issosin nafo anit asurne ba? <sup>5</sup> Ame Apolos ghari? A ghari Bulus? Acinari bara inughere ina yinnin, kitin ko uyeme unit Kutelleḡari nani imon su. <sup>6</sup> Meng wa bilisu, Apolos tizza nmyen ku, nan nya nani Kutelleari nati inin tikunan. <sup>7</sup> Nanere, unan tibila nin nnan tizzu nmyen na imonmonari ba. Nan nya nani unan tibila nin nan tizzin. <sup>8</sup> Nene ame unan tibila nin nan tizzin nmyen unit urumere, nani ko gha mine ma seru uduk me dedei nin gegeme katwa me. <sup>9</sup> Bara arik adon katwa Kutelleari. Ulambu Kutelleari, Makeke Kutelleari. <sup>10</sup> Nafo na ubdu Kutelle na iwa nei nafo Cikilari makeke, Meng wa tuno kutyie umong da tunna nkewe, Nan nya nani na ko uyeme unit su seng yanda na ama li ubun nin kewe. <sup>11</sup> Bara na ina malu u tunu amere Yisa Kristi. <sup>12</sup> Nene asa umong nke kitene litinoe nin nizinariya, anzurfa, atala acine, akataku, tikpi, sa alut, <sup>13</sup> ima punu katwa me, bara liyirin ma punu kunin kanang. Bara ima punu nan nya nla. Ulari ma dumunu unutulun ngegeme nimon

ile na ko uyeme unit nasu. <sup>14</sup> Vat nimon ile na unit na ke asa i naza ama seru uduk me. <sup>15</sup> Nani asa katwa mmong nduno, ama niu nin diruu, ame litime ma se utucu, nafo ulenge na ase usurtu in nan nya nla. <sup>16</sup> Na iyiru anung kutyi nlira Kutelleṛari na Uruhu me sossin nan nya mine ba? <sup>17</sup> Asa umong nnanzu kutyi nlira Kutelleṛ, Kutelleṛ ma nanzu unit une. Bara kutyi nlira Kutelleṛ di lau, nanere anung wang. <sup>18</sup> Na umong wa risuzu litime ba. Andi umong din yenju adi jingjing nan nya nko kujie, na aso “ulalang” anan so jinjing. <sup>19</sup> Bara njinjing in yih ulele tilalanghari kiti Kutelleṛ. Bara ina nyertini adin kifizu ajinjinghe nan nya tiwankari mine. <sup>20</sup> Tutung Cikilarie yiru ukpilizu nnit ujinjinghe udi hem. <sup>21</sup> Nani na umong nwa fo figiri nin nit ba! Bara imon vat nfyari. <sup>22</sup> Sa Bulus, Apolos, Kefas, sa uyih. Sa ulai, sa ukul, sa imon ilenge na idi nene, sa ilenge na idin cinu vat nminare. <sup>23</sup> Anung tutung anit nKristiari, a Kristi tutung unit Kutelleṛari.

## 4

<sup>1</sup> Nene na unit yenje ari nafo ne, iba yenju ari a cin Kristi nin na nan katuwa nliru Kutelleṛ ulinyeshin. <sup>2</sup> Vat nene ile imon na idin piziru use unare na iyinin ninghe. <sup>3</sup> Bara nani kitining imon icing ghari anung su usharia, sa ushariya nanit asurne. Bara meng wang na nsu litinin ushariya ba. <sup>4</sup> Na meng yiru imomon ile na idin belle litinighe ba, bara nani na uso unan ndiru ba. Chikilari unan su nsharia. <sup>5</sup> Bara nani na iwaboḅ usharia kitenne nimomon a kube

dutu, na ame Chikilare nsa ba. Aba damun nin nimon ikanang na inyeshin nan nya nsirti, a puun kibinai. Nanere kogha ba seru uru me kiti Kutelle. <sup>6</sup> Nene, nuwana nilime nan nishono, inna su ile imone meg litinighe nin Apollos bara anughe, bara kiti bite anun yinno ile imon na idin bellu, “Na iwa kata ille imon na ina nyertu ba bellin.” Bara nin nani na umon nan nya mine wan ghanin litime kitene nmon ba. <sup>7</sup> Ghari di yenju umon di ugang kitin na mong? Iyaghari idumun ile na ina filinfiyari ba, andi ina filinferi, iyari udin nfo figiri nafo na usu nane ba? <sup>8</sup> Una malu use vat nile imon na udin nin suwe! Una mallu use imon nachara! Nenere uma su tigh, bara tinanse tisu tighowe nanghinu. <sup>9</sup> Meng ndin nkpilizu Kutelle na cheu ari nono kadura nafo anit alle na idin nca nkul. Tiso uyii imon yenju udu nono nanan kadura Kutelle nin nanit asurne. <sup>10</sup> Arik allalag bara Kristi, annug ajinjinghari nanyan Kristi, arik ana nsali nakara, anug anan nakara, ina ghanin anunku, ina toltin arik ku. <sup>11</sup> Udak ko kube nene tidin kukpong ayin nin kotu nayi mmen sa imon kidowo icine ina fo ari kang na tidumun nilari ba. <sup>12</sup> Tidinsuu katuwa kaag, katuwe nin nachara bite, iwa yassu ari asa tise mmari, ti kuru tineu assa ti tere nibinai. <sup>13</sup> Iwa nanza nari lissa, assa tilira nin mang. Har tina so tisso, ina dun yenje ari nafo likinkin nyi nin nimon izemzem vat. <sup>14</sup> Na ndin nyertu ille imone nti minu iso imon ncin ba bara nkelle munu nafo nono nayi nigh. <sup>15</sup> Assa idumun nanan ndursuzu minu nimon amui likureri nan nya Kristi, na idumun nacif

gbardang ba, bara meng naso ucif mine nan nya Kristi Yisa nan nya liru Kutelle. <sup>16</sup> Bara nani sun nafo menghe. <sup>17</sup> Unare nati nto minu Timoti ku, kitimine gonni na nya yinnu sa uyenu gono nya Nchikilari, aba lizinmunu tiba nighe nan nya Kristi, nafo na ndin dursuzu nani vat natii Kutelle. <sup>18</sup> Nene among mine dumin nghantinu, insu nafo na mba dak kitimine ba. <sup>19</sup> Nba dak kitimine nene nin nyinnu Kutelle. Kikaneri mba nin yennu ligam nliro na nan nghantinu nati, Vat nani yinnu akara mine. <sup>20</sup> Bara na kilari tigoh Kutelle na ligam nliro ba, likara ri. <sup>21</sup> Iyaghari idumun suwe? Ndak kitimine nin lishonna sa usu nan nya nfip mishau?

## 5

<sup>1</sup> Tina nlanza ubellen uworu nenge kulapin zina di nan nya mine, imusu kulapi ko na iyinna mun nan nya na lumai wang ba. Nafo na ubelle di umon nan nya mine adin nnozu nin nwani ncife. <sup>2</sup> Anun din nfo figiri! Na iwana di tiyoma ba? Ulle na assu ille imon gbas iba kallughe nanya mine. <sup>3</sup> Bara nani, nsali ku nan nya kidowo, vat nani nduku nan nya nfip milau, inna malu usu nan su nille imone ushariya nafo uwandi kite. <sup>4</sup> Assa izurro ligowe nan nya lisan Chikilari bite Yesu, nfip nighe duku nin likara Chikilari bite Yisa-nna mallu usu unit une ushariya. <sup>5</sup> Nnakpaghe nachara nshitan a mollu kidowo finawa, bara fisudu me nanse utuchu liri ndak in Chikilari. <sup>6</sup> Ufo figiri mine caun ba. Na anun yiru nwo uyist chingilin asa utah likalang ta fukuku ba? <sup>7</sup> Wesen atimine kitin



nyist ukuse inan nso likalang lipese nene na idi nafo likalan nborodi ubishe. Bara Kristi, kukam ntuchu bite, na iwa gutun mmii me. <sup>8</sup> Bara nani na tisu ubuki nayi abo, na nin nyist ukuse ba, uyist na udin dasu nin likara linanzang nin magunta, amma nin mborodi nsalin nmucu ucine nin kidegen. <sup>9</sup> Nna nyertu munu nan nya kuffa niyerte nighe yenje iwa munu ati nin na nan kulapin nzina. <sup>10</sup> Uwan ma bellin minu nworu na nlon libau duku na linmunu minu nan nanan nzina nanan nsu nimon nyi, nin nanan bolusu nimon, ukudayi, sa akiri, alle nanit, sa anan nchil, ucaun inuzu nan nya nyi. <sup>11</sup> Nene ndin nyertu munu yenje umon wan munu liiti nin gwana kilime sa kishono na adi nan nyan Kristi nin nanit alle na idin su uzina, sa anan nsu nimon nyi, sa anan nchil, sa anan tizogo, sa anan nson ntoro, sa ukiri. Yenje iwa lii imonli ninghe. <sup>12</sup> (Iyaghari myen ninku nin su nale na isali nan nya kutii Kutelle ushara?) Na, anughere din woru isu ale na idi nanya kutii Kutelle Ushara we ba? <sup>13</sup> Bara nani Kutelle dinsu alle na idin ndas ushara “Nuntunon fisudu finanza fone nanya mine.”

## 6

<sup>1</sup> Assa umon mine di nin nung nin mong, a ba yiru gwane a do mun kuti nshariya nyih? Ado ninghe kitin nan salin nyiru Kutelle. Na mbara a do mun kiti nibinai nilau. <sup>2</sup> Na ayiru anan nibinai nilau nyiru Kutelle ima su uye ushara ba? Andi anung iba sharantu uyii, na iwanya ikelle imon inanza ba? <sup>3</sup> Na iyiru

tibasunono kadura Kutelle ushara ba? Andi nanere iyaghari ba wantinari tisu ushara nimon natibit ba? <sup>4</sup> Andi ibassu ushariya nimon ushafa kolomeliri, bara iyanghari iba yiru ille imone idomun kiti nale na idimun liyisin licine nanya nono Kutelle ba? <sup>5</sup> Imon ncighari kiti mine. Na umon unang nyiru duku nan nya mine ulle na awanya a kelle nnung me kitik mine linana nanilime nan nishono ba? <sup>6</sup> Nafo na ulire di, ulle na ayinna nin Kutelle asa ado nin gwana unan yinni nin Kutelle kutii nshariya, i do mun kiti nnan nshara ulenghe na ayiru Kutelle ba! <sup>7</sup> Kidene andi nnung di nan nya mine anun anan nbi imal diu. Iyaghari ba wantin minu useru kulape, iyari bati na iba yinnu fi ba? Vat nin nani fe nari usunu icuce muna ba? <sup>8</sup> Anung nati alapi icuce among nuwana mine, nilime nan nishono! <sup>9</sup> Na anun yiru ba anan nsu lidu linanzang iba diru ugadu kilari tigoh Kutelle ba? Yenje iwa yinin nin kinu. Anan nnozu nin na nawani buu, anan nchil, anan nzina, ukaruwa gankilime nin nani lime anan nozu nan nanilime, <sup>10</sup> alikiri, anan nsu nimon nyi, anan nsontoro, unan minu nimon nanit- na umon mine ba se ugadu tigoh Kutelle ba. <sup>11</sup> Among mine nadi nanere. Ina ni kussu munu, inani na lente lau, inani natimunu iso dert nan Kutelle nanyan Lisa Nchikilari Yesu Kristi nin nfip milau Kutelle bite. <sup>12</sup> “Ko iyene imon icineari kitinigh,” bara na ni ko iyaghari imon icine ba. “Ko iyeme imone icineari kitinigh,” na mbaso kucin nimon imon nyẹ ba. <sup>13</sup> “Imonli libburiari, libburi tutun bara imonliari,” amma Kutelle ba narri inin vat.

Na kidowo ina ke kin bara usuzun uzinari ba, ina ke kidowo bara Chikilari, ame ba pizuru kidowo imonle Chikilari. <sup>14</sup> Kutelle wa fya Chikilare aba kuru a fya arik ku nan nya likari me. <sup>15</sup> Na iyiru anung abiri nidowo nin Kristie? Ba na mba yaunu abiri kidowa Kristi mmunu nin kilakia? na uwa so nani ba! <sup>16</sup> Na iyuru ba ulle na amunu kidowo nin nkilaki iso kidowo kirum ninghe ba? Nafo na inyerte na bellin, "Awanbe ba so kidowo kirum." <sup>17</sup> Nanere ulle na amunu Chikilari iso fisudu wurume ninghe. <sup>18</sup> Choon piit kitin kulapin nzina! "Ko kome kulapi na unit din nsu kudii mamal kidowari," unan su kulapin nzina adinsu nan nya kidowo mere. <sup>19</sup> Na anung nyiru nidowo mine Kuti Lisosin Nfip milau ulle na assosin nan nya mine ba, ulle na ina seru kiti Kutelle? Na anung anan natiminere ba? <sup>20</sup> Bara ina seru munu nin nimon ilau. Bara ikatin ikurfung nani sun liru Kutelle nan nya nidowo mine.

## 7

<sup>1</sup> Nene ubellen nimon ulenge na iwa nyertu udak kiti nig: abu duku na caun na nnit, na awa nno nin nwani me ba. <sup>2</sup> Vat nani barra idumuzunu nadu nzina, ko uyeme unit yita nin nwani litime, ko uyeme uwani yita nin nles litimee. <sup>3</sup> Ame ules ba ni uwani me ule imon na ikifo anighe uwani tutun udu kiti nles me. <sup>4</sup> Na uwani dinin likara kitine kidowo me ba, ulesse re, nanere ulese dinin likara kitene kidowo me ba, ame uwane re. <sup>5</sup> Na iwa nazuzu atimine ni linonin kiti kirumba mine se nin yinnu mine nin kubi ko na anun nfere, bara inann na atimine kiti

nliran, ikuru, ida munun tutuun, bara shetan wa dumun muna nin salin nkifu natimine. <sup>6</sup> Meng bellu munu ule imone uyinuari na ita munu kuwa ri ba. <sup>7</sup> Usu nighere nworu kogha wa nafo na meng di bara kogha dinin ume udadiuwe kiti Kutelle. Umon uleli, umon ulele. <sup>8</sup> Kiti nale na isa su ilugma ba, nin nawani allenge na ales mine na kuzu, meng belle ucaun kitimine iso sa ilugma nafo meng. <sup>9</sup> Andi na iwasa nani isu llugma nin nworu ijuju zu ninlip. <sup>10</sup> Nene udu kiti na nan nilugma, meng na munu uduka-na miari ba ame Cikilar: “Na uwani nwa molu ilugma nin nles ma na.” <sup>11</sup> Bara asa molo nin nlese, na aso sa ilugma, andi na nani ba, kpilla kiti nlese, “Na ules nwa ko uwani me ba.” <sup>12</sup> Nin nani kagisine nbelle (miari na Ciikilari ari ba) nworu asa nkan gwana dinin nwani una nsalin nyinnu sa uyenu amini din lanzu nmang lisosine ninghe, na awa koghe ba. <sup>13</sup> Nanere asa uwani dinin nles una nsali nyinnu, sa uyenu amini din lanzu nmang lisosin ninghe, yenje awa molu ilugma. <sup>14</sup> Bara ules una nsalin nyinnu abaa se useru bara uwane unan yinnu sa uyenu nanere wang uwani bara ules me unan yinnu, an na nanii ba nono mine wadi anan dinon kidegen iba seru nani. <sup>15</sup> Asa unan durtu Kutelle sosin ligowe nin nan salin dortu Kutelle, nworu na iba so ligowe ba, na iwutun, nan nya imus nilele gwana kilime sa kishono alkawali ntereghe ba, Kutelle na yyicila nari tiso top. <sup>16</sup> Bara iziyari fe ba yinnu, uwani, sa fere ba utucun nles fe? ulles uyir, sa fere ba utucun nwanife? <sup>17</sup> Cas na kogha su lisosin lo na Cikilari na kosu nani mun, ulenge na Kutelle na yicila

nnani mun, ulelere uduka nighe nanya natie nlira vat. <sup>18</sup> I wa yicila umon nin kalu kucuru nanya iyinnu sa uyena? Na awa kala kullap kucure ba kubi ko na iwa yicila umon sa udiru nkalu kucuru nan nya yinnu sa uyena? Iwa awa kala ghe kucure ba. <sup>19</sup> Na ukallu sa usalin kallu kucuru unere imomon ba, ule imon na idi suwe inere udortu nduka Kutelle. <sup>20</sup> Na ko gha so nan nya nyicilu me na Kutelle wa yicila ghe ada yinin. <sup>21</sup> Uwa di kucina kubi ko na Kutelle wa yicila fia? Na uwa dama kitene ba, bara unan uso töp su nanni. <sup>22</sup> Bara ulle na Cikilari na yicilaghe nafo kucin, Cikilari na bunku ghe, nanere ulle na ina bunku ghe kubi na iwa yicilaghe ayinin a uyinu ame kucin Kristi. <sup>23</sup> Iwa seru munu nin tamani, na iwa lawa acin nannit ba. <sup>24</sup> Nuwana nilime nan nishono, ko iyaghari na nan nya ko lome iwa di nanye, iwa yicila nari tiyinin na ti so nani. <sup>25</sup> Nene kiti na allenge na isa su ilugma ba, na ndinin nduka unuzu nCikilari ba, Meng nna ukpilizu nigh nafo umon ulle na, Cikilari na Lanza nkunekune nigh, amini na yinin nin mie. <sup>26</sup> Bara nani, Meng di nkpizilu bara uniu nbun ucaun unit so inda na adi. <sup>27</sup> Uterin kiti nwani bara islin nilugma? Na uwa piziru ubunke, kiti ni nin ba. Yenje una bunku ilugma inani sosin sa ilugma? Na uwa piziru uwani ba. <sup>28</sup> Uwa usu ulugma, na usu kulapi ba, asa uwani nsali nilugma, nsu ilugma, na ata kulapi ba, vat alle na isu ilugma iba yitu nin fizu nayi gbardang. Ndinin su nkosu munu nanghinu. <sup>29</sup> Bara nanii meng belle, nwana nilime nan nishomo, (Kubi Karin ba. Uyiru nene udu nbun alle na idinin

nawani na iso nafo na idumun ba. <sup>30</sup> Allenge na idi kuculu ba.) Anan liburi libo, na isu nafo na idi nin liburi libo ba, allenge na isere ko iyang, so nafo na anan nimon nacara ba. <sup>31</sup> Allenghe na idi lanzu mang nye, na iso nafo nna allenge na idi lanzu nmang ba, bara ucin nye ba dak ligan. <sup>32</sup> Meng dinin su ishutu nan nya nsali noku kibinai, gankilime una nsali nilugma, din cizu kibinai me kiti nCikilari a póghe ayi. <sup>33</sup> Unit anan nilugma din cisu nibinai kiti nimon nnyi aba tiyiziya apo awani mi kibinai. <sup>34</sup> Ame nkoso, nanere tutun unit unan sali nilugma, sa kuburu ita nibinai nimon nCikilari, inda na iba so lau nan nya nidowo nan nruhu, ame uwani nilugma din ti kibinai nimon nnyi, ules lanza nmang me. <sup>35</sup> Nna bellin munu ilele bara atiminere, a na ntimunu libarda ba, bara imon icine, inan nna atimine kiti Ncikilari sa ukosu kibinai. <sup>36</sup> Asa umon din kpilizu na adi su gegeme kiti nle na ibasu ilugma ba, a ame kubure nyenju akus me din nkatuzu, bara ntok nayi me dinin likara na isu ilugma, na kulapi ari ba. <sup>37</sup> Awa yiru kibinai me na abasu ilugma ba, na ubellen doli duku ba, aasa akifo ntok litime abasu gegeme, an di na asu ilugma ghe ba. <sup>38</sup> Ulenge na asu lugma nin kubura me asu gegeme, ame ulle na afere na aba su Uugma ba, nani katin. <sup>39</sup> Uwani terin kiti nles me vat nayiri lisosin mine, asa ulese nku, ibunku ghe, asu imon ilugma, ulle na kibinai me inyinna isu ilugma, vat nin nani nanya nCikilari cas. <sup>40</sup> Nanya nnag ushara aba se liburi libo, awa so nafo na lisosin me adi, Meng din kpilizu ndinin Ruhu ulau Kutelle.

## 8

<sup>1</sup> Nene ubelle nille imon na ina bọ bara incil, tiyiru nani, “vat bite dinin yiru” uyinnu din dak nin ghatinu liti, usu din ke imon. <sup>2</sup> Asa umon din kpilizu ame yiru imoimon, unit une nsa yinnu nafo udu ayinin ba. <sup>3</sup> Adin umon dinin su Kutelle, Kutelle wang yirughe. <sup>4</sup> Kitene in li nimonli ile na ina nakpa incil: arike yiru “incil nanya yii ulele na imonari ba” tutung, “na nkon Kutelle duku ba kurumari.” <sup>5</sup> Vat nin nani, amon duku alle na idin sunani atelle nanya kitene kani sa inyii, nafo na atelle nan cinilari dukun gbardang.” <sup>6</sup> Vat nani kiti bite tidi nin Kutelle kurum Ncif bit unuzu kiti mere vat nimon, kiti mere ti sosin, nin Cikilari Yisa Kristi warum. kiti mere imon duku nin kit mere arik sosin.” <sup>7</sup> Vat nani, na ule uyire koghari dimunba. Amon na di incil, inug leo imonli ilenge na iwa nakpa incil, nibinai mine wa ti nanza usali likara. <sup>8</sup> Na bara imonliari ba ti iyiru nari udu kiti Kutelle ba. Na ti nana ba tiwa din woru na ti leo ba, sa tiwa so sa ule ukatin nani. <sup>9</sup> Nin nani sun seig, na u shutu mine nwaso umon ule na adinin nagang nanya yinnu sa uyenu ba, imon ndiu. <sup>10</sup> Bara umon wa yene fi, ule na adinin yiru, udi nli nimonli kutyin incil. Na nibinai minere nin diru nakare ba ni ani agang nli nimon ile na inakpa incile ba? <sup>11</sup> Bara uyiru kidegen fe kitenen ncil, gwana fe kilime sa kishono anan diru likara na Kristi wa ku bara inug, aba wullu. <sup>12</sup> Yinno asa uta gwanafine kilime sa kishono unanzu nibinai mine nin sali likara ukul, uta Kristi ku kulapi. <sup>13</sup> Bara nani asa imonli ba ti gwananin kilime sa

kishono atiro, na nba kuru nli finawa tutun ba, bara nwa ti gwana nin kilime sa kishono adiu.

## 9

<sup>1</sup> Na meng in shutu ba? Na Meng gono katawari ba? Na Meng wa yene Yisa Cikilari bite ba? Na anug hère katuwa nacara nighere nan nya Ncikilari ba? <sup>2</sup> Andi na Meng gono kadurari kiti namon ba, ai kiti mine ndi, bara anughere ba dursu annit meng gono kadura, nan nya Ncikilari. <sup>3</sup> Ulelere ukesu kiti nale nge na udi dumu zuni. <sup>4</sup> Na arike nwanya tileoti sono ba? <sup>5</sup> Na wanya yira awani ba anan nyinnu Kutelle nafa kagisin nanan kadura, nin nuwana nan nya Ncikilari ame Bitrus. <sup>6</sup> Sa Barnabas nin mi arikere ba su katuwa casa? <sup>7</sup> Ghari di katuwa nafa kusoja, ame leo nin litime? Ghari ba bilisu imon nan nya a wanya aleo ba? Sa Ghari basu libiya ninab sa uwuru asonu madare? <sup>8</sup> Ndi belle ule imone bara likara nnit usurne? Na uduka bellin nano ba? <sup>9</sup> Nafa na udi ninyerte nduka Musa, “Yenje uwa tursu fina unu kubi na adi katuwa kunen nileo.” Kidege innari cas Kutelle min nania? <sup>10</sup> Na ame din nliru kitene bite ba? Iwa nyertin bara arikere, bara ulle na adi nikawa na asu nin ti kibinai, unan su kinorso na asu nin ti kibinai nworu aba se kubi ngirbe. <sup>11</sup> Asa ti bilisa imon Ruhu nanya mine, uba yitu gbardang kagha arike nwase imon lisosin nye kiti mine? <sup>12</sup> Andi amon di pirizu imon na idi imine kiti mine, na arike dumun Nile na ikatin ba? Na nanere ba, na tina se ileli imone ba. Tima teru ayi bara ti wa wantin uliru nlai Kristi. <sup>13</sup> Na



anug yiru ba nworu allenge na idin su katuwa kutyin nlira iba se imonli mine kutyin nlire? Inung alle na idi katuwa kitene nbadagi, adi nli imonli me kikene bagade? <sup>14</sup> Nanere, Kutelle wa ni uduka aworo ulle na adin bellu nlai, iba se imonli me kiti nbellu nliru nlai. <sup>15</sup> Vat nin nani, nan nsa se imomon nanya nile imone vatt ile imone bara inan su menku imomon ba, ukatin nku nin nworu anung yene ufo figiri nighe so uhem. <sup>16</sup> Asa ndin bellu uliru nlai, na nile imon na iba fo figiri ba, bara ikifoi nsu nani, kash nin mi asa na nbelle uliru a nlai ba. <sup>17</sup> Bare nwa su illenge imone nani nin kibinai kirum, mba seru ulada andi na nin kibinai kirum ba ndu nin katuwa kanga na iwa nie. <sup>18</sup> Iyaghari ulada nighe? nworu uwa bellu uliru nlai meng ba ni uliru nlai sa useru nimomon, nan baseru ile imon na nyene inaghari nanya nliru kulelle. <sup>19</sup> Bara nani meng shutu na cara na nit vat, nlawa kucin kiti nanit vat, bara nnan wunno annit vat. <sup>20</sup> Kiti na yahudawa so nafo kuyahudawa, bara nna wuno ayahudawa, kiti na ilenge na imin nduka, nso nafoo allenge na imin (vat nin nani, na meng min ushara ba) nnan wunun alle na imnin ushara. <sup>21</sup> Kiti nale na isali nin nshara, meng wan so nafo unan nsalin nshara. (na Meng litinighe na nta unan nsalin nshara ba kiti Kutelle ndi nanya nduka Kristi) nnan wunno alle na isali nan nya nshara. <sup>22</sup> Kiti nan nsali likara, meng so unan sali likara anan sali likara nso imon vat kiti anit vat bara ko niyagh Meng tucu among. <sup>23</sup> Nchin su imon vat bbara ubellen nliru Kutelle, bara Meng ma nan se upiru nan

nya imari me. <sup>24</sup> Na anung yiru nwo nyanan cum vat anang cume din su ucume, ama waseme minere asa asere uduke? Bara nani sun ucum ilii uduke. <sup>25</sup> Unan katwa ncum din zulu kidowo me ayita nin minu nnu nyanan vat nzulu kidowo me. Inung dinsu iseru uduk ulenge na uдин nanuzu, ama arik din cum tinan seru uduk un salin nanuzu. <sup>26</sup> Bara nani, na meng din cum sa ukpiluzu ba a na ndas libau nfunu ba. <sup>27</sup> Ama meng kifu kidowo ning nning ta kinin kucin, bara kimalin wazi ninghe kiti namong, na meng wang iwa nazue mung ba.

## 10

<sup>1</sup> In dinin su iyinin, nuana nilime nin nishono, achifbite vat wa chinu kadas kuwut idi kata nan nya kurawa, <sup>2</sup> vat mine iwa shitin Nani nmeng nan nya musa nin kuwut a kurawa, <sup>3</sup> vat mine tutung wali imonli ilau irumwe, <sup>4</sup> vat sono nmeng nsonu mi lau mirumme. Bara na iwa sono kiti kuparan Kongo Na kuwa dortu nani, kuparan kone wa di Kristi ari. <sup>5</sup> Among mine gwardan na Kutelle wa lanza nman mine kan ba, unare wati abimine yita bú nan nya kushoę. <sup>6</sup> Nene ile imone inin so nari imon yenju, bara arik wa dortu imon inanza nafo na inughe wa su. <sup>7</sup> Nati waso anan chip ba, nafo na amon mine wadi-nafo Na iyerti di “Anit wa so ileu isono, imon fits nin nibinayin nozu nan nawani, izu avu.” <sup>8</sup> Na tiwa nozo nin nawani buu ba, nafo na amon mine gwardan wa sunani, anit amoi akut aba nin Na tat nin ku liri lirume. <sup>9</sup> Nati wa mala Kristi ku ba, nafo na gwardan

namon mine wasu iyii ini wa kifizin nani ikuzu. <sup>10</sup> Tutun na tiwasu ugwonduluba, nafo na amon mine gwardan wa su, unan kadura Kutelle ule wa molu nani. <sup>11</sup> Nene Ile imone wase nani inan so arikeku imon yenju, inani wa yertu inin inan sonari imon wunnu natuff bara kitene bitere kubin nmalu iyii <sup>12</sup> Bara nani ame ule na adin yenju ayisin Na asu sen bara awa diu. <sup>13</sup> Na imonmon duku ilenge na idi inmaluzu madamu irika na anit yiruba; Kutelle unan kidegenari udu ligan: na ama sun minu ise umalun indiu ule na ukati likara mineba, vat nani nin nimon malun indiuwe ama punu nari Libau nnuzu bara tinan se uteru nibinayi mun. <sup>14</sup> Bara nani nuana insu kibinayi nin, con pit kitin chil. <sup>15</sup> Ndin liru nan ghinu nafo anan kpilizu bara inan wutu kimal nimon ile na in belle. <sup>16</sup> Kakuk nmari na asa tita nmari ku, ikosuzoari nan nya nmii in Kristi ba? Likalan nfungul na tidin pucu, ukosuzoari nan nya kidowon Kristiba? <sup>17</sup> Bara na likalan nfungul lirumari, arik alenge nati karin kidowo kirumari, vat bite din li likalan nfungul lirume ligowe. <sup>18</sup> Yenen anutin Israila nburnu: na asa ileo ujuju ulauwe, na uso limununari nin nimon ile na isu napik alaunwe ba? <sup>19</sup> Iyaghari ndin bellu nene? Au inchil imoimonaria? Sa imon ile na ikanja kiti inchil imoimonari? <sup>20</sup> Nbelle nenge, imon ile na alumai din duzu idi nakwiza natala na Kutelleri idin nizughe ba, agwargenuari. Na ndinin su imunu ati nin nagwergonu ba! <sup>21</sup> Na iwasa isono kakkuk Ncikilari ini kuru ida sono kakkuk nagwergenu ba. Na uwasa uyita nin Cikilari bite kutebul me ukuru uyita kiti kutebul nagwergenu

ba. <sup>22</sup> Sa timananzu Cikilare ayi asu liyarina? Akara bite katin ame? <sup>23</sup> “ Imon vat inseruari” na vat nimonari di in libunba. <sup>24</sup> Na umon wa pizurru nman litime ba. Nani, na kogha pizuru nmang ndon lisosin me. <sup>25</sup> Uwasa uleu imon ilenge na idin lessu nkasau sa utirunu. <sup>26</sup> “Uye nin nimon ilenge na idin nan nye in Kutelleari.” <sup>27</sup> Asa unan salin yinnun nin Kutelle nyichilafi ndi li nimonli, fe ta kibinayi umadu, leu imon ilenge na iceu nbunfe sa utirunu. <sup>28</sup> Vat nani, adi umon worofi, “imoli ilele inuzumun kiti ncillari nari uli ninin. Nane bara ulenge na abellin fiari, a bara ukpilluzu kibinayi tutun. <sup>29</sup> Ndin bellu ni kpiluzu kibinayi inlelere, a na kinfe ba. Bara iyari bati nfang kibinayi nighe umoghari kpilizai muna? <sup>30</sup> Nwali imonli ilele nin liburi libo bara iyaghari iliri nanzan kitene nimon ilenge na nta nlira ku? <sup>31</sup> Bara nani, sa idin li sa idin so, sa vat nimon ile na idin su, sun vat bara uzazunu Kutelle. <sup>32</sup> Na iwati umon se imon ntiruba, sa nan nya na Yahudawa sa a Hellenawa, sa nan nya kilari Kutelle. <sup>33</sup> Tan kayiri isu nafo na nna su kayir npo vat nanit ayi nan nya vat nimon, na nin pizuru nimoimon in litinin ba, bara anit gwardan nan se utuchu.

## 11

<sup>1</sup> Sun lisosin limang nafo men, nafo na men din su lisosin nafo Kristi. <sup>2</sup> Nene in di liru mine bara na idin lizunu nin mi nan nya nimon vat tutun inin yisin gangang nan nya nadadu alenge na inani munu. <sup>3</sup> Nene ndinin su iyinin Kristiari unan nbu nko kame gankilime,

a gakilime ubun nwani, a Kutelle amere unan bun nKristi. <sup>4</sup> Gakilime ka na ata nlira sa ayene ubun a litime kirno na ana litime ngongon ba. <sup>5</sup> Nani vat uwani ule na ata nlira sa a yene ubun sa ukirrunu litime na na litime ngongon ba. Bara usosin imon irumere nin woru apele titime. <sup>6</sup> Asa na uwani ma kiru litime ba, na awarin titime cot. Andi imon cingharib uwani werin sa apelu titime, nbara a kiru litime. <sup>7</sup> Naneri na gankilime wa kiru litime ba, bara na ame kuyeleri nin gongon Kutelle. Ame uwani ngogon ngankilimeri. <sup>8</sup> Bara na iwa ke gankilime unuzu kitin nwani ba, uwaneri iwa keghe unuzu kitin gankilime. <sup>9</sup> Na iwa ke gankilime bara uwani ba, iwana ke uwani bara gankilimeri. <sup>10</sup> Unere nta uwani cau ayita nin litappa tigo litime, bara nono kadura Kutelle. <sup>11</sup> Vat nin nani, kitin Cikilari, uwani sosin lisosin litime ugan nin gankilime ba, a na gankilime wang sosin lisosin litime ugan nin wani ba. <sup>12</sup> Nafu na uwani na dak unuzu kitin gankilime, nanare gankilime na dak unuzu kitin nwani. A imon vat unuzu kiti Kutelle. <sup>13</sup> Sun asarawe ikosu ulire nin natimine, udi dert uwani ti nlira udu kiti Kutelle. nin litime fwangha? <sup>14</sup> Ani na makeke litime ndurso minu nenge, asa gankilime di nin titi jakaka imon ncighari kitime, <sup>15</sup> Ani na makeke ndurso minu nwo asa uwani di nin titi ti jakaka na imon ngogon mere ba? <sup>16</sup> Asa umon di nin mong uliru ugang nin lele, na arik dinin namong al ada ugang ba, sa nan nya niti nlira Kutelle wang. <sup>17</sup> Nan nya nale adue, na ndin liru mine ba, bara asa izuro ligowe, na idin dazu nin nimon icine ba sai inanzan.

18 Nin cizune, nna lanza au asa izuro ligowe kuti nlira, usali munu nati din nan nya mine, na nyina nin lirimine vat ba. 19 Uso gwas na ise naissin nan nya mine, bara alenge na iyinna nin liyissin mine inan se useru nan nya mine. 20 Bara iwa zuro ligowe na idin li ujibin NCikilare ba. 21 Asa idin le, kogha mine dirtinu nli ninme imonli, a amon dutu nin kukpon, a umon na yita nin kushiton ntoro. 22 Na idi nin nilari na imali iso nan nye ba? din yassu kilari Kutelle ini tizza anan likimon ilanza ncingha? Nyaghari nba bellin minu? Meng nrù munua? Na nma zazun minu kitene lile imone ba! 23 Bara nna seru kitin Ncikilari ilenge imon na meng wang nani minu, Cikilari Yisa, nin kitike na iwa nari ame, ayauna ufungule. 24 Kimal ntin lira, apuco uni aworo, "ilele kidowo nigharidi, ka naki di bara anung, man suzun nani ilizizin ninmi" 25 Nanere tutung awa yaun kakukke kimal jibe, aworo, "kakkuk kane kan ciu nliru upese ari nannya nmī ning. Suzun nani kubi kongo na idin sonē nin kakukke inan lizino nin me." 26 Bara vat kubi ko na ileo ufungal ulele nin kakkuk kane, idin girzunu nkul Ncikilarere udu lirin same. 27 Vat nlege na adin li ufungalle sa adin so kakkuk Ncikilare a ayita likara linanzang ama yitu nin kulapi kiti kidowo nin mī Ncikilare. 28 Na unit tu adumun litime, ma anin li ufungal ani sono kakukke. 29 Vat ulenge na adin li aso sa uyenun ngongong kidowo Ncikilare adin li aso usharawari litime. 30 Unnare nta among mine gbardan di nin sali nakara a tikonu, among mine wang nkuzu. 31 Bara asa ti dumuzuna atibite,

iba sunari ushara ba. <sup>32</sup> Nani asa idin su nari ushara, ti dinse ugwaru kitin Ncikilare, bara iwa da walin nari ligowe nin yih. <sup>33</sup> Bara nani nuana ning, asa ida zuro ligowe kiti kileowe son nà nati. <sup>34</sup> Asa umon din lanzu kukpon, na ali kilari, bara iwa da zuro ligowe nan da so ushara kubi ko nan nda nma bellun minu imn ilenge na idin nbun.

## 12

<sup>1</sup> Kitene nfilizunu nfip milau, nuana nilime nin nishono, na ndi nin su iso nin kulon ghe ba. <sup>2</sup> Iyiru nenge kubi ko na iwa di anan sali fiu Kutelle, iwa wunu minu udu kiti ticil mituri na iwa dofin nij ghinu. <sup>3</sup> Bara nani ndi nin su iyinin na umon masu uliru nin Fip Kutelle a woro “ Yisa unan la'anari,” anani na umon wasa a woro “ Yisa Cikilari,” se nin Nfip milau. <sup>4</sup> Nene unizu nfip migangang duku, a Nfip mirume <sup>5</sup> . Nituawe di ngangang, a Cikilari urum. <sup>6</sup> A nit wa duku ngangang, nani Kutelle kurumere nati kogha uni yinin use nani. <sup>7</sup> Nene kogha ina nighe nkanang Nfip milau bara ulinbun nkogha. <sup>8</sup> Bara kiti nmon ana ni Nfip nliru nhikima, a mn tutung agbulang licasarak nan nya Nfip mirume. <sup>9</sup> Nan nya Nfip mirume ana ni uyinnu sa uyenu, a umn ufillun Nfip nshizunu nin tikonu. <sup>10</sup> Kiti nmong nituwa tigoh, kiti nmon uanabci, kiting mong tutung uyinu maferuferu nfip, kitinmon tilem ngangang a kiti nmon tutung ukpilizu tilem tilem. <sup>11</sup> Vat nani Nfip mirumere din su katwa nan na mine, adin nizu kogha ku ussamme, nafo na ame nfere. <sup>12</sup> Nafo na kidowe di kirum

nin niti nitiku gbardang tutung vat nitinite nin kidowo kirumere, nanere Kriste di. <sup>13</sup> Nafo na udi nan nya Nfip mirume iwa shintin nari vat nan nya kidowo kirume, Ayahudawa sa Ahelenawa, sa Acin sa nono kilari, iwa tinari vat tisono nan nya Nfip mirume. <sup>14</sup> Bara na kidowe di kirumari ba, amma ki karin. <sup>15</sup> Kubunu nwa woro, “Na meng ucharari ba, na meng di kubiri kidowo ba,” na uso na meng kidowa ba. <sup>16</sup> Kutuf nwa kuru kuworo “Na meng liyiziari ba, na mmyen nin duku nin kidowo ba,” na uso na ame kubiri kidowari ba. <sup>17</sup> Ankuru kidowe vat liyiziari, ulanzu wa yutu nweri? Andi kidowe vat kutufari, ulanzu kuyya wa yitu nweri? <sup>18</sup> Vat nani Kutelle na cioe ko kome kubiri kidowo kiti kanga na ame na di nin suwe. <sup>19</sup> Andi tutung kidowe di kubiri kurumari, kidowe wa yitu nwe? <sup>20</sup> Negene idi niti niti gbardang, amma kidowe kirumari cas. <sup>21</sup> Na lizi wasa li woro ucara “Na ndi nin bukatafe ba,” A na liti ma bellu kubunu, “Na ndi nin bukata fe ba,” <sup>22</sup> Bara abiri kidowo alenge na tidin yenju fo na ni dinin katwa ba, ni di mun kang. <sup>23</sup> Anin abiri kidowe na tidin yenju nafo na imon icine ba, na ti ni ani ngongong, anin abiri alenge na ti sali sa uyenju tini ani ughantinu kang. <sup>24</sup> Nengene abiri alenge na a sali nin bellen ghatinu, ina malu ghatinuani, negene Kutelle na malu udofuzu anin vat ligowe, anin gphantina kang alenge na isali mun. <sup>25</sup> Ana su nani bara iwa se usalin nmunu nati nan nya kidowe, bara abirie nan mino ati, usu mine so nani urume. <sup>26</sup> Nani kubiri kurum nwa lanza ukul, vat ngisin nabiri lanza ligowe nin kone. Sa



nkon kubiri nwase ughanitinu, ngisine su liburi libo ligowe nin kunin. <sup>27</sup> Nengene anung kidowo in Kristiari abiri ngangang kidowo me. <sup>28</sup> Kutelle na fere nan nya nikilisiye ucizune anan kadura, a Anabawa, a Pasto, anan tat anan dursuzu ni nyerte nin na lenge na idin su nitwa nin likara Kutelle, nin nanan shizinu nin tikonu, nin nalege na din buzunu anit, nan nalenge na idin su nitwa nan nya ti wofis, nan na lenge na idin bellu tilen ngangang. <sup>29</sup> Vat bite anan kadurarie? Vat bite a Pastoarie? Vat bite anan dursuzu niyertearie? Sa vat bite din su nitwa nin likara Kutelle? <sup>30</sup> Vat bite di nin fillu nshizunu nin tikonua? Vat bite din su uliru nin tilen ugangangha? Vat bite din kpiluzu uliru nin tilen ugangagha? <sup>31</sup> Na tisu ntok nnizu Kutelle ugbardang. Meng ma nin dursu minu libau longo na likati vat nin lau.

## 13

<sup>1</sup> Nwa su uliru nin tilen nanit, sa nin tilen nnono kadura Kutelle, na nnin dini su ba, nba so nafo lileng gberere sa fidowon mbejulu. <sup>2</sup> Asa ndi nin fillun anabci nin yiru kidegen kanga vat na kiyeshin. Andi ndi nin yinnu sa uyenu ulenge na uwasa ufiza akup. Andi na ndinin su ba na meng imonari ba. <sup>3</sup> Asa nna vat nimon ile na ndi bara akimon, sa nni kidowo nighe ijuju, andi na ndi nin su ba ukpini imonku ba. <sup>4</sup> Usu di nin nayi asheu, uyita nin lidu licine. Na usu dinin liyarin ba, sa ivet ba. Usu din fo figiri ba, na usu din tizu umucu litiba. <sup>5</sup> Na udin dasu nin diru litiba, na udi nin su litiba, na udin lanzu kughullu ba, na udin cisu adu ananzang liburi ba. <sup>6</sup> Na udin su

liburi libo nan nya nimon inanzang ba, una din liburi libo nan nya kidegen. <sup>7</sup> Usu din nnonku kibinayi nin nimon vat, udi yinnu nin nimon vat, udi nin nayi akone kitene nimon vat, unin yita nin terru kibinayi nin nimon vat. <sup>8</sup> Usu di nin ligang ba. Andi annabci duku, iba katu, andi tilen tilen duku, tiba tiligan, andi uyiru duku, uma katu. <sup>9</sup> Bara uyiru bite di agir agir, anabci bite wang di agir agir, <sup>10</sup> Asa unan kulie nnin da, ilenge na idi agir agir ma katu. <sup>11</sup> Kubi kongo na nwa di gono, nwa liru nafo gono, nwa yenjize nafo gono, nwa kpiluzu nafo gono. Kubiko na nwa wasirin, nna sun adadu tinone. <sup>12</sup> Nene tidin yenju nan nya nimon nyeju ayeli nafo nan nya nsirti, lire tima yenju umuro nin muro. Nene uyiru nighe di kugir, lire uyiru nighe makulu nafo na mmal kulu uyinoe. <sup>13</sup> Imon itat ilelere nlawa, uyinnu sa uyenu, uciu nayi, nin su, vat nan nya nitatte imon idiyawe usuwari.

## 14

<sup>1</sup> Cheo ayi npiziru nsu nin filizunu Kutelle, bara inan se usu anaba. <sup>2</sup> Bara ulenge na adin su uliru nin long lilen na adin su uliru nin nanutari ba nin Kutelleari, na umon wasa ayininghe ba bara na adin bellu nan nya Nfip milau imon ile na inyesin. <sup>3</sup> Ulenge na adin su annabci, din liru nin nanitari atizanani ikunjo, atizanani likara, anin tizanani ayi asheu. <sup>4</sup> Ulenge na adin su uliru nin tilem din zazinu litimere, a unan sun annabci kpizina tukunan kilari Kutelle. <sup>5</sup> In di nin su vat mine iwa din su uliru nin tong tilem, nin likati nane wang, usu nighari isu anabci. Ulenge na

adinsuzu anabci katin unan liru nin tilem adi na unan kpilizu tileme duku ba, bara kilari nlire nan se ukunu. <sup>6</sup> Nene nuana nilime nin nishono, nwa dak kitimine nnin liru nin tong tilem, iyaghari ima se kitinighe, se de ntunun minu nliru fwang, sa uyiru, sa anabci, sa udursuzu kiti? <sup>7</sup> Andi adadu nsali tilai nafo isharya sa abengbeng na tiwuyi mine di ngangang ba, ima ti iyinzari umon yinin iyaghari idin wulusue? <sup>8</sup> Asa ipene kulantun ghe nin lon li wuyi ugan na lin likumba, umon ba ti iyinzari ayinin kubin kelu ndu likume? <sup>9</sup> Nanere di ni ghinue wang; asa idin su uliru nin ti gbulang tongo nati di kanan ba, iyizari imati umong yining imon ile na ibelle, iba liru, na umon ba yinu ba. <sup>10</sup> Tilem duku gbardang nyi, na nlong duku sa uma'na ba. <sup>11</sup> Bara nani andi na nyinno imong ile na idin bele nin long lilem ba, nmaso kumara kiti nnan lire, ame unan lire wang so kumara kitining. <sup>12</sup> Anung wang andi idin yalinu nworu iyene Nfip micine in nan nya mine yitan yakyak n kelu kutin nlira. <sup>13</sup> Ame ule na adin liru nin long lilem na asu nlira ase ukpiliuwe. <sup>14</sup> Bara nwa ti nlira nin long lilem, uruhu nghari di nlire a na kibinayi ni nnin mara imon icine ba. <sup>15</sup> Nyaghari meng basu? Mba su nlira nin ruhu ning, nkquru nsu nlira nin kibinayi ning tutung. Mba su avu nin ruhu nin, nkuru su avu nin kibinayi nin tutung. <sup>16</sup> Andi na nani ba, uwa su liru Kutelle nin ruhu ame ule na adin lanzu timap feba ti inyizari aworo "usonani" andi udin nakpu ngudiya, a na ame yiro imon ilenge na fe din belue ba? <sup>17</sup> Fe nnaKpa ugudiye

fe gegeme kang, na ulele in nin setikunang nan nya ba. <sup>18</sup> Ngode Kutelle nworu nkatın minu vat nin su nlıru nin tilem ngangang. <sup>19</sup> Ukatin mengku nworu nbelin agbulang ataun nan nya kuti Nlıra nin yinnu ning nnan kele among, nnin woru nenge nbelin agbulang amui nin tilem likure a na umong lanza ba. <sup>20</sup> Nuana nilime ni nishono, na iwa su ukpilizu tinonoba. Kitene nimon inanzang, son nafa nono, nan nya kpilizu mine yitan awasara. <sup>21</sup> Nan nya sharawe ina yertın, “Kiti nanit tilem tilem nin tinu namarari nma lıru nin nanit alele; vat nin nani na ima lanzui ba,” Ubellun Ncikilari. <sup>22</sup> Bara nani tileme alamar, na kiti na nan dortu Kutelle ba, se kiti na nan salin dortu Kutelle. U anabci na kulapari kiti na nan şali dortu Kutelle ba se kiti na nan dortu Kutelle. <sup>23</sup> Andi bara nanere, vat anan dortu Kutelle nwa dazuro isu ulıru nin tilem, anan das nin nanan salin dortu Kutelle nin da pıra, na iba woru tidi nin nilazaba? ag, <sup>24</sup> Iwa dın woru vat mine di nan nya annabci kunan das sa unan salin dortu Kutelle nin da pıra, amase uyinnu vat nile imon na alanza, ame kpilizu nin litime imon irika na alanza idin belue. <sup>25</sup> Imon liyeshin kibinayi me ba nuzu kanang anin diu nin muro me a su Kutelle usujada a durso kanang Kutelle nan nya mine. <sup>26</sup> N'yaghari tutung nuana nilime nin nishono? Iwa da zuro ligowe, umon dinin na sem, umon udursuzu kiti, umon upuzunu nimon, umon ulıru nin tilem, sa ukpilizu tilem. Na tısu imon vat ti nan se tikunant kuti Nlıra. <sup>27</sup> Asa umon lira nin lon lilem, na ise anit naba sa natat, nan nya mine, ise umon unan kpilizu nimon ile

na ibelle. <sup>28</sup> Asa na unan kpiliu dukuba, kogha mine min tik nan nya kilari nlire, na ana su uliru nin litime usanme a Kutelle. <sup>29</sup> Na a annabawa naba sa natat su uliru, na among anan lanze nin dumun ulire na ibelle. <sup>30</sup> Andi ujinjin duku nan nya lissosin mine na ayinno, na ame ulenge na ayita nlire ti tik. <sup>31</sup> Andi kogha mine nsu u annabnaci nalalarum bara kogha mine nan se likara nibinayi. <sup>32</sup> Bara ti ruhu na anabawa, inung a anabawere nin nati mine din dortu mun. <sup>33</sup> Bara na Kutelle. di Kutelle. ku shogolog ba, kun lisosin limanghari. Nafu na nitin nlira nanit alauwe di. <sup>34</sup> Na awani mizin tik nan nya niti nlira. Bara na iyina nani isu uwiliru ba, na inughe yita nin ni nati, nanere uduke din belu. <sup>35</sup> Andi imoimon duku ile na idin konu nani ayi inyinnue na itirin ales mine nilari. Bara imon ncinghari uwani su uliru nan nya kilari nlira. <sup>36</sup> Uliru Kutelle na nuzu kiti minere? Anughere una duru kiti mine cassa? <sup>37</sup> Asa umon din pillu ame annabiari sa unit unan ruhu, na a belu nenge imon ile na ina nyertin minu uduka Ncikilariari. <sup>38</sup> Asa umon nari ule ulire na iwa yinin ninghe. ba. <sup>39</sup> Bara nani linuana, piziran usu nworu isu u ananbci, nani na iwa wanting uliru nin tilem ba. <sup>40</sup> Bara nani na tisu imon vat nan nyan kanang nin libau dert licine gegeme.

## 15

<sup>1</sup> Nene nlizin minu, nuana nilime nan nishono, ubelen lirun ntucue na ndin belu minu, ulenge na ina seru inani yisin ku. <sup>2</sup> Na nya nnare ina se utucu, asa imino ligbulan nlire nin likara na

ndin belu minu, andi na iyina mun ba iba so hem. <sup>3</sup> Bara meng nani minu nafo ucizunu nliru ulenge na meng wang na seru: Kristi na ku bara. alapi bitere nafo ubellun nliru Kutelle. <sup>4</sup> Iwa kasughe, amini iwa fiyaghe kisseke liri lin tat nafo ubellun nliru Kutelle. <sup>5</sup> Awa durso litime kitin Kefas, nin kiti mine inun likure nin naba. <sup>6</sup> Kimal nani tutung awa durso litime kiti nuana nilime nin nshono na iwa katin akalt ataun nan nya kubi kurume, gbardan namon mine dunin lai udak kitimone, among mine namalu udu nmoro. <sup>7</sup> Tutung awa duro litime kitin Yakub, akuru aduro litime. kiti nanan kadura me vat. <sup>8</sup> Umalzinu vat, awa duro litime kitining, nafo gono kanga na ina marughe uyishi. <sup>9</sup> Mere kabene nan nya nanan kadura me, na nbati iyicilai unan kadura me ba, bara meng kilari Kutelle wa neo. <sup>10</sup> Nani ubolu Kutelle uni nta nmini nso ule na ndi, a ubolu me nme na una so hem ba. Nan nya nani, Nna katiza nani nin su katwa vat. Vat nani na mere wadi ba, ubolu Kutelleri na udi ninmi. <sup>11</sup> Bara nani sa meng sa inung, nanere tidin belu ulirun ntucue, nanere anung nyina mun. <sup>12</sup> Nengene andi idin belu Kristi nafita nan nya nanan kul, nyizari among mine din belu au na ufitu nanan kul duku ba? <sup>13</sup> Andi na ufitu nanan kul duku, na ame Kristi wang ina fiyaghe ba. <sup>14</sup> Andi na ina fiya Kristi kuba, to uwazi bite nso hem, a uyinu sa uyenu mine tutung nso hem. <sup>15</sup> Uma so tiso anan nba kinu kiti Kutelle, bara na tina ti ananba ti ta Kutelle, nworu ana fiya Kristi, a nani ana fiyaghe ba. <sup>16</sup> Bara andi na ifiya anan kul ba,

ame Kristi wang na ina fiyaghe ba. <sup>17</sup> Andi na ina fiya Kristi ku ba, uyinu sa uyenu mine nso hemõ, inin du nan nya nalapi mine. <sup>18</sup> Inung alenge na ina kuzu nan nya Kristi inung tutung wang inana. <sup>19</sup> Andi nan nya nlenge ulaiyere, cas tidi nin ciwu nayi udun nbu nan nya Kristi, nan nanit vat, tiso imon nkune kune. <sup>20</sup> Nani ina fiya Kristi ku nan nya nanan kul, nonon cizinu na lenge na ina kuzu. <sup>21</sup> Bara na kitin nit urumari ukul na dak, kiti nit urumere wang ufitu nanan kul madak. <sup>22</sup> Nafõ na unuzun Adamu vat naku, nanere wang unuzun Kristi vat ma se ulai. <sup>23</sup> Nani ko uyeme nin unme ucine: Kristi kumat ncizunu, nin dortu nij nalenge na idi anitin Kristi ima tinani ulai nin dak me. <sup>24</sup> Kimal nimaline, asa Kristi ma nakpu Kiping tigowe kiti Kutelle uciffe, kubi ko na aba musuzu tigo nin nanan tigowe a anang nagan. <sup>25</sup> Aba su tigoh me udu kubi kongo na ale na inari ame ba tumunu nshin nabunu me. <sup>26</sup> Unan ni vira nimaline na ima musuzu vat ukulari. <sup>27</sup> Bara, "Anamalu uciu ko iyapin imon vat nshin nabunu me," kube na iworo "a cau imon vat," udi kanang nworu na ulele nmunu ame ulenge na a cio ko iyapin imon na ame litime di nnanye ba. <sup>28</sup> Vat ni lenge imon na ina nighe tigo kitene, na vat nimon ame usaunne litime ma ni litime kiti nlenge na ana ni imon vat kitime, Kutelle Ucif nan so vat nan nya vat. <sup>29</sup> Andi na nani ba nyizari inung alenge alenge na idin tizu nani ubaptizima bara inung? <sup>30</sup> Iyaghari nta tissosin nan nya fiu ko kome kubi? <sup>31</sup> Nuana nilime nin nishono, ufo figiri nighe nin ghinue ulenge nan dimun nan nya

Kristi Yisa Cikalari bit, meng belinmunu ulele: ndin kuzu nan nya kidowo kolome liri. <sup>32</sup> In kpina nin nyang, nafo inyenju nnit usurne, andi inwa su nnun nin ninawa tene in Afisas, andi na iba fiyu anan kule ba? Na ti li ti so, bara na tina ku nin kwui. <sup>33</sup> Na iwa rusuzu minu ba: "Ligo nan nanan nakara ananza din nanzu lidu licine." <sup>34</sup> Fitana nan nya moro, sun lissosin li lau! Na iwa li ubun nin nalapi ba. Bara na among mine di nin yiru Kutelle ba, nbelle nani inan lanza ncing. <sup>35</sup> Umon ma woru "iba fiwu anan kul inyizari? Nin niyapi nidowari iba sa?" <sup>36</sup> Anung anan tanni! Imong ilenge na ibilisa na iba cizunu tikuna ba andi na ibijo ba. <sup>37</sup> Imus ilenge na ubilisa na ima nuzu nin kani kidowe ba, bara ima yitu imusari cas, ima nin de kpilio iso ileu sa imoimon ugan. <sup>38</sup> Kutelle ma ni fining kidowo ka na ame fere, tutung ko fome fimus nin kinme kidowe. <sup>39</sup> Nidowo dizi ngangang, kin nit usurne duku, kin finawan ntene duku, kin kuyin duku, a kin fiboa yita ku. <sup>40</sup> Nidowo duku tutung nin kitene a nin yii yita ku. Ngogon nidowo kitene kane di ugan a ngogon nidowo inyii ugang. <sup>41</sup> Nmong ngogong duku min wui, a nmong ngogon ku min pwui, a nmong ku min niyini, bara ngogong nfong fiyini di ugang nin nfong fiyini. <sup>42</sup> Nanere wang ufizu nanan kul. Ibila kining nan nya biju, iba fiu kining nin salin biju. <sup>43</sup> Ibila kining nan nya nsalin ngogong, ifiya kining nan nya ngogong. Ibila kining nan nya nsali likara ifiya kining nin likara. <sup>44</sup> Ibila kining nan nya kidowo, ifiya kining nan nya kidowo nruhu. Andi kidowo nkul duku nanere



wang kidowo nruhu duku. <sup>45</sup> Nanere tutung ina nyertin, " unit un cizune Adamu wa so unan lai," Adamu nimalin so uruhun nnizun lai. <sup>46</sup> Na kin ruhuere wa tu kidaba kishowo nin kidughe kin ruhue nin da. <sup>47</sup> Unit uncizune kunan minari, iwa keghe nin lidau. Unit unba na nanuzu kitene kani. <sup>48</sup> Nafu na ulenge na ina keghe nin lidau di, nanere wang alenge na ina ke nani nin lidau di. Nafu na unan kitene kane di, nanere wang inung alenge na idi anan kitene kane di. <sup>49</sup> Nafu na tina yiru umuro nnit unan lidau, nanere wang tiba kuru tiyiru umuro nnit kitene kani. <sup>50</sup> Nene nbele ule ulirue, nuana nilime nin nishono, nya kidowo nin mii iwasa isu ugadu kipin tigo Kutelle ba, nanere wang kidowo in bijuzu wasa kisu ugadun kin salin bijuzu ba. <sup>51</sup> Yeneng! Nbellin minu kidegen kanga na ki nyeshin. Na vat bitari ba kuba, vat bite ima kpiliwu nari. <sup>52</sup> Ima kpiliwu nari nin kubi cingiling, nini kpush nin niyizi, nin wulsunu kulantun nimaline. Bara ba dunu, ima nin fiwu anan kul nin nidowon salin bijuzu, ima nin kpiliwu nari. <sup>53</sup> Umaso gbas kidowo kin bijuzu shon usalin bijuzu, kidowo nkul shon kin sali nkul. <sup>54</sup> Asa kin bijuzue nshono kin salin bijuzue, kidowo nkul shono usali nkul, kubi konere uliru ulenge na iwa nyertin manin kulu, "Imila ukul nan nya nnsara" <sup>55</sup> "Ukul, unnsara fe dinwe? ukul lito fe din we?" <sup>56</sup> Lito nkul kulaperi, a likara kulapi udukari. <sup>57</sup> Vat nin nani, liburi libo bit di kiti Kutelle, ulenge na ana ni nari unnsara nan nya NCikilari bite, Yisa Kristi! <sup>58</sup> Bara nani, nuana insu ni nilime nan nishono,

yisinan nin nakara, sa ucancanu, ko kome kubi ikpizin ngbardang nan. nya katwa NCikilare, bara iyiru na katwa mine kitin Cikilare maso kahem ba.

## 16

<sup>1</sup> Nene nbelen mapitiru pitiru nanit alau, nafa na nna bellin anan dortu Kutelle nati nlira in Galantiya, nanere anung wang sun. <sup>2</sup> Liri lin cizinu nayiri kuzor, na kogha mine rafa imoimon likot ligan kayiri me. Asa nda na mapitiru pitire ma yituku ba. <sup>3</sup> Asa nda duru, alenge na anung yinna mung, mba tu nani nin niyerti idi ni mapitiru pitiru mine in Urshalima. <sup>4</sup> Andi uma caunu meng wang do, ima du nan mi. <sup>5</sup> Mba dak kitime, asa nda kata in Makidoniya-bara nma katun Makidoniya. <sup>6</sup> Nmoti nanghinuere mbaso udu kubin pitiru kiti, bara inan buni ncinnighe, vat kiti kanga na nma du. <sup>7</sup> Bara na ndi nin su in yene munu nene nan nya kubiri bat ba, ndi cissu kibinayi ntinayiri gbardang nan ghinu, andi Cikilare in yinna. <sup>8</sup> Vat nani meng ba so in Afisos nduru kubin pentecost, <sup>9</sup> Vat nin woru katwa puni pash, a anan shina yita ku gbardang. <sup>10</sup> Nene asa Timitawus nda, na aso nan ghinu sa fiu, bara adin su katwa in Cikilari nafa menghe. <sup>11</sup> Na umong wa yasighe ba. Buno ghe nya shewu anan da kiti ning, bara ndin cissu iyizi in yene ghe ada ligowe nan nya linuana. <sup>12</sup> Nengene ubelen Apolos gwana bit: Nna ghe likara kibinayi a dak kitimine nin linuana, na a yinna udake nene ba; ama dak asa ase kubi. <sup>13</sup> Sun lissosi nca, yisinan nin nakara nan nya

yinu sa uyenu mine, sun nafo nanilime, yitan nin nakara. <sup>14</sup> Vat nimon ile na ima su sun nan nya kauna. <sup>15</sup> Iyiru anan kilarin Istifanas, inughere anan cizinun seru nlrin tucu Akaya, inughe na ni atimine kiti katwa nanit alau. Nene ndi minu kucukusu, nuana nilime nan nishono, <sup>16</sup> nakpan atimine kiti inmusu nanit ane, nin vat lenge na adin bunu nan nya katwa a anontizo ligowe nan ghirik. <sup>17</sup> Ndi su liburi libo nin dakin Istifanas, Furtunatus, a Akaikus; inun kulo kika na anun duku ba. <sup>18</sup> Bara ina da gphantini uruhu nighe nin na lele. Bara nani cau iyinni nin nimus nanit nafo alengene. <sup>19</sup> Anan dortu Kutelle in Asiya din lissu minu. Akila nin Briskila din lissu nan nya NCikilari, nin nanan dortu Kutelle nan nya ngamine. <sup>20</sup> Vat nuana nilime nan nishono din lissu minu. Lisson atimine nin ni lip icine. <sup>21</sup> Meng, Bulus, nsu ile iyerte nin nilip ncara ning. <sup>22</sup> Andi ko uyeme unit na adi nsu usun Cikalari ba, na utin nu kifo ghe. Na Cikalari bite dak! <sup>23</sup> Na ubolu Ncikilari Yisa so nan ghinu. <sup>24</sup> Usu ning so nan ghinu vat nan nya Kristi Yisa. Uso nani.

**Amo New Testament**  
**The New Testament in the Amo language of Nigeria**  
copyright © 2020 Door43 World Missions Community

Language: Timap (Amo)

Translation by: AFenlason, ALHASSAN SUDA, Chrispher Ishaya, James, Kawusu David, Pungs Makarios, Zephaniah A. Isau, tab04-nig, tab12-nig

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-07-06

---

PDF generated using Haiola and XeLaTeX on 21 Feb 2024 from source files dated 31 Aug 2023

cb0040a9-2597-55c7-975b-461d5a397911